

夜

雨

秋

燈

錄

夜雨秋燈錄卷八

天長宣

鼎瘦梅香

刑房吏

揚州秦封翁名愚字不愚爲甘泉刑房吏公門中稱老斲輪而性最柔善廉介不妄取鄉愚財年五十猶空囊無一錢娶妻某氏亦慈祥婉淑年與同無子嗣所居湫隘近市外僅小客座環樹案牘架寥寥几案供小吏繕冊而已緘印後生計益拙時屆除夕顧囊無米竈無烟夫人暗拔頭上釵付質庫稍經營歲朝所需者翁不知也攢眉蹙額坐廳事頗以貧爲慮空拳怒搏無術送窮忽聞剝啄聲啓扉一客賀賀然入後隨小僮肩負布囊纍纍甚重素未謀面心異之客揖而後坐遽問曰公秦翁乎曰然轉詢姓氏鄉貫客約略對坐少時翁拊憶客之面目衣冠似

曾與茶社中疊見之而未一晤語計來揚已年餘矣遂問客遠來何見教客曰翁掌刑科聞有某年某事某卷宗當儲於瀛第有之乎翁袖出小摺閱移時曰有客曰能賜一觀乎曰檢而後得須破半日問客曰素知翁長者禮絕苞苴然歲暮亦當需孔方請以此卷見賜願奉千金爲長者壽傾囊出朱提堆案頭榮榮如雪曰此五百兩其半請俟檢出當携奉祇領翁曰諸客揖與約諄切至再携僮去翁掩關對銀心計曰是何要案值得如許啓鑰照冊目檢出移几就燈晷閱之蓋國初時揚人某某曾爲吳三桂脅從吳滅其子孫逃至皖變姓名國家誅吳黨甯道者劉甘泉令訪其子孫已切結報無後仍有種種均於其子孫大不便翁閱至此恍然曰此訟徒也必與其子孫有深隙意購此卷去族滅一門不堪設想欲得鉅金度歲則必壞陰隙就待

陰陽無虧則必反其金意不決置卷於几往來廳事其躊躇夫人出見金與冊呼翁詢顛末不答又視其蹀躞愴怵遽攬其袂而婉導曰夫子何必爾貧常事也錢多則起居動靜從擴錢少則日用禮儀從簡況年年今日不過如是烏言得過且過夫子不聞乎翁曰錢不難致几上非耶顧取之不易耳言已擲冊付夫人閱已復往來小步目視地更猶豫夫人本閨秀覽畢驚曰此何物事奈何以銅臭喪人是阿堵必卷值無疑矣夫子不決妾爲決之卽取香鑪餘燼拉雜摧燒灰飛燄起翁視之拍掌喜曰妙哉吾心至此始定顧堂堂鬚眉不及巾幗之決斷何哉相與歡喜贊歎少頃客又齎五百金來索翁卷翁詭作懊惱狀曰僕命薄不能享千金遍搜覓無跡想久爲鼠子嚙去矣客見几上灰大愕曰休矣僕僕邗江僅落得飽看二分明月耳携前金

懊喪去翁掩扉詣內視折脚鑪中已煮香醞案頭薄有肴果神前小具香燭始知夫人已暗爲捫揣大喜夫人曰非妾不欲富顧一對老夫妻合之已百歲尙欲此儻來者于神怒何爲翁甚以爲然酬神畢對酌就寢翁夢中彷彿見一金甲神峨冠吉莫靴綵雲纓纓侍從甚都手捧金元寶大如斗曰上帝鑒汝廉以天儲正餉與爾從此敵鄧尉石家矣翁笑曰非僕願也神大詫曰個男子顛耶坐視金穴銅山若傲屣然則有范丹癖乎翁不語侍從曰且去不與若較是真窮骨頭神果去少頃又一朱衣神白鬚浩浩手捧冠帶與翁曰上帝鑒汝善以此與汝可以爲民牧免作刀筆小吏翁曰非我願也神曰若以爾不事咕吡耶近今日不識丁援例者亦能拾青紫奚必毛錐子始爲敲門磚翁不語神曰爾舍此機會則蓋棺時猶一識字農後豈不悔乎

神後一美人捧翟莠笑曰渠欲學嚴子陵高蹈任他窮餓煞去
休神果去少頃聽雲中笙歌隱隱香風四流芝葆羽旄垂如雲
錦一羽衣美人控麒麟至隨侍者如王子登魏寒簪許飛瓊之
流懷中一靈馨兒膚潔白如玉冠金束髮頸上金藏鬚眉目妍
麗美人未及語翁見之喜曰嘻若得此小嬌生萬事足矣美人
笑曰天上仙人習靜怕聽呱呱啼且寄翁家好否翁起攬入懷
愛不忍捨美人策麟倏升紫霄翁正愕胎忽懷中兒大啼心驚
頓悟黃梁也視晨光已動左右隣舍已敬神鳴爆竹不能寢呼
夫人告夢中事甫述却冠帶夫人笑曰懷中兒幾幾愛煞老奴
大駭蓋夫人同夢也揚俗清晨忌言夢頃正元旦隣家僅隔一
葦壁聞夫婦言唾罵之不敢語寒催臘去春氣融融二月夫人
信水復來一索而得是年翁覺遇事皆如願境亦漸亨修葺所

居宅嘉平月夫人果產子嚶嚶墮地視之夢中英物也遂名曰夢玉翁喜曰不圖老蚌能產明珠由是益修持夢玉慧美善讀某太守見而愛之招伴公子讀十一齡卽冠童子軍十九入詞林太守以女妻之時太翁太母已古稀均嬰鑲翁猶充刑房吏甘泉令延入慰之曰公封翁矣不必再爲案牘勞形請削其名翁稽首曰某非戀棧者不過在公門中多一年多積一點德遺子孫令曰翁之心已達九重天毋過泥立命以己之盛興鼓樂送歸第

悞僕氏曰君子佩玦所以決疑也古今來多少忠臣孝子一朝失足千古懷羞者皆臨時狐疑苦無決斷耳諺云公門好修行老斲輪豈不習聞所奇者夫人之一炬也栢子同焚蘭花入夢報應之捷如影隨形可喜亦復可懼

塑少陵像

桃源捕廳呂君云四川制臺某公修葺百花洲草堂寺其中間有泥身肖杜少陵像貌俚俗且傾圯公欲葺而新之捐通省官員廉銀釀萬金臺榭廊房頓更舊創惟縻師肖少陵像落成後成都太守某公請公拈香公見之卽怒曰此何足爲子美先生像盍毀之更塑工云吾輩非讀書人至神佛鬼判僅就前人所肖者依樣畫葫蘆猶覺彷彿若欲得少陵真面目吾恐劉繼復生亦渾不似太守曰爾試更之十餘更公見之均不能稱其意間當作何狀曰吾亦說不出惟若所肖非富貴氣卽塵俗氣與枯瘠氣終不足爲忠君愛國者寫照也盍再更之縻師術窮藥聖具却走太守遍招募得十數人皆川中肖像稱巨擘者肖之不成停工年餘忽有某先生來應募問其人則儒生久困場屋

者曾觀縉師搏沙爲神像羨之以其法作睡褶康頗佳由此攷
究精進近爲里人捨小像餽口太守召入與語大悅諭肯已像
長五寸餘紅衣坐小楠木龕中執麈尾披紗幘作維摩居士狀
太守呼家人詳視無不失笑蓋酷似也翌晨送之草堂某先生
囑人盡散閉其門趺坐兩三日無聲息忽大叫躍起三日畢其
工太守來詳讀覺與前所肖者果不同然終不知如制臺意否
姑入告制臺問肖者何人曰鄉里人耳制笑曰不知牛鬼蛇神
作何惡狀曰公試往閱可乎制臺親詣寺甫至階砌一仰視遽
呼曰得之矣急趨入伏地叩曰是真飯顆山頭戴笠真容也召
某先生入則一龍鍾老布衣問何術之神曰某亦不知少陵像
若何但由幼至壯且老惟熟讀浣花詩集讀野哭長櫬諸句往
往掩卷深思淚泔泔下積思旣深又往往寤寐中見有白晢長

翁者立几案間是像也卽夢中人耳制臺大喜爲文勒石記其事厚遺某且與以官不受時於察吏中荐拾小像某由此大富子孫讀書成進士已幾邀誥典稱封君矣

懷儂氏曰浣花翁詩卷長留豈精靈尙在天地間乎積思旣深鬼神來告精誠所結聲氣相通大之則聖人於樊牆見舜彈琴見文王夢寐見周公小之卽如某先生之塑少陵像是也江南劉庄場關帝廟聖像爲天下第一里之人召塑工尙周將軍像不克尙一日有漁翁拳鬚赤足斗笠短衣兩臂努筋露骨風采不凡來廟告工曰汝曷若依我樣尙將軍乎工異之卽照摹成而漁翁忽不見又山東兗州府息馬地所奉聖像聞爲前明魯王夢中所見者蓋帝護王駕到此工之肖像也事與劉庄大同小異

血炬照銀

鄒維生云咸豐十年粵逆陷杭州多藉世家第宅爲僞王府有一第極宏敞前明宰相錢坤之故第也子孫式微第已數易主惟正廳閣老匾屹然尙在一賊居而惡之毀額爲薪忽有小銅匣鏘然隨之墮封鏤甚固啓視中儲小帳簿一本端楷書某房窖銀若干兩某屋窖金若干兩距地若干尺崇禎某年月日誌皆錢相國筆賊目按簿掘之得金百餘萬凶焰益熾噫錢相國爲子孫百年計慮其困窮宅縱售而匾決不售詎知二百年後爲賊助餉乎當崇禎朝鋒煙四起國帑空虛不思以此獻君上而藏之遺子孫忍視有甲申之變則錢之爲宰相者可知矣因思賊擾吾皖之慘尤勝於他郡焚燒姦掠外首重挖窖雖千年古窖子若孫不能知居是宅者不能知而賊能知之余常不解

其故後有自賊中遁出者云其法用人血染料豆喂馬久之則
眼赤見人咆哮思醫用人血染藤葦作炬燃以照屋屋若有古
窖火即宛曲向地直鑽就鑽處掘之必得蓋人性好阿堵故血
炬靈妙若是吾謂錢閣老即不藏此簿於區內而朱提百萬亦
絕無能漏網者噫嘻窖藏者何其愚也遺安遺危一語能令守
財虜猛省否

懷儂氏曰銀從良鑽從戈殺人之物生死以之亦何其愚

玉蟾蜍

江南邵秀才名簾其父官陝之甘泉令携之署司筆札幼聘吳
氏女未娶也偶遊碧雞觀遇道士贈一玉蟾蜍曰郎但窺之除
不祥露則不靈受而贈以金不顧一笑去明年年十九其父遣
回籍迎娶而後來因第宅空以函與之囑就堂伯家暫棲遲比

回堂伯某翁甚喜伯母尤愛憐留住且代經營婚務某翁生子
馨胞姪輩均將冠未娶塾中就傳讀晚卽抱書回亦樂與簪互
言笑伯母以西廂供簾櫳下榻遣婢織織伺左右月餘屆吉期
鼓樂盤輿送新郎入就甥館而篋頗懶於去贅入吳宅禮成甫
三日卽潛回看伯母日下春始行十日後逕回仍就西廂宿遣
之去復來詢若何泫然曰兒戀伯母若嬰兒戀乳哺耳月餘遣
回陝不應其父書疊來催伯父將怒叱始怏怏携新婦去臨行
僕夫車馬在道途而篋猶對長者洒淚卽對僕媼亦悽惶人不
知何以故反憐其孺慕眞耳去後更鑪箴織織獨居忽幡腹若
孕顧織織貌雖妍麗從不與人苟言笑且某翁御家嚴獨心賞
織織端正二老覩其狀疑之倚醫者診之曰喜脈動孕也翁大
怒疑詢其子馨穉實不承復詢姪輩笑曰阮咸曾盜姑家婢陳

平且盜嫂此亦大不了事若翁必疑兒何不以婢子見賜翁曰
如刀奴言婢孕絕不干爾事窮詰磬惟窘急呼冤欲覓死翁始
罷夫人悄悄問纖纖亦不承但云不知何以故越月餘竟產舉之
男也翁欲棄委巷夫人不忍裹以襦裸送之育嬰堂與保母乳
暗施錢五十千爲兒衣食費翁聞訊卽以棄對且勗兒與家人
勿洩勿外揚而纖纖由是爲人所不齒毀盛粧操賤役蓬頭垢
面雖苦無怨言磬兄弟覲面輒加毒詈忽戚人樂生名曰者風
雅士偶自福建回館翁家見纖纖若甚憐惜私詢磬磬對以曾
孕私兒是下賤也翌晨婉致翁願下聘納纖纖爲小星翁告夫
人頗稱意遂却聘卽命携去纖纖臨行向夫人涕泣拜曰兒受
夫人恩殺身不能言報袖出玉螭螭奉夫人曰此兒幼所珮私
兒若殤便罷倘私兒生六歲後乞夫人以珮佩之死更銜結不

能忘夫人視珮不知所從來受而姑應之婢去隨樂生之閭伉儷甚得年餘大婦死纖遂升正室生子女二樂由幕服官爲直刺織居然冠珮稱命婦祁夫人聞之甚慰遣伴視兒已五歲頗清俊惟太愍生夫人忽病劇纏綿牀簀間語磬曰吾不負婢子託也立命呼兒來與以珮遂逝明年翁亦逝磬服闋與發俱入泮自篋去至今倏經十六載無耗偶問篋夫婦不和諧吳氏鬱鬱死其父亦卒於任月餘篋果泣扶翁櫬携婦櫬歸葬窀穸事畢走至伯父母墓道哭泣盡哀自顧年將不惑尙無子第宅又久廢時有魅遂賃宅就磬同居甚友愛桑梓間篋歸撫翁巨橐甚豐爭欲娶以女續鵲膠媒妁盆門篋俱力却再言則厲聲色投袂走人寄之而不知所以也發磬偶治饒爲兄祝弧辰飲甚歡夜卽風雨聯床互傾衷曲詢篋曰兄年正壯何故却媒而甘

鰥豈欲爲嫂夫人守男子節耶。鰥不應窮詰之甚。支吾又問娶
十年何絕不作繭籠太息流涕曰。孽由自作。復何言。罄疑益研
詢。鰥忽張目問曰。弟家婢緘緘何往。耶對以適人。鰥浩歎泣下。
鰥遂告以適樂赴閩生子。稱夫人一切瑣瑣。鰥破涕又若甚慰。
兩弟益堅。問久之始白曰。吾實告兩弟可乎。兄因婢始無子也。
當日寄西廂乘隙與婢狎久之。情濃盟山海及贅視新婦。大不
及婢子可人。故時來西廂宿。一日晨起。潛入婢子房。登榻效于
飛。兩情正洽。忽伯母起步近房。闔大聲督婢。懶兄大懼。鑽避榻
下。由是得痿症。雖有淫具。同椽人藥之不獲。寡婦亦以此鬱鬱
死。頃痿如故。是以不欲娶。後婦惟四十無子。嗣恐香火斬。是誠
淫報。不可對祖宗於地下。言已大慟。鰥發撫掌大笑。不能止。曰
十六年前案破矣。又曰。賀兄有子曰。子從何處來。若螟蛉兒。終

不足奉烝嘗磬曰兄累弟遭撻楚將何以報篋不解詢之遂爲
縷述婢孕生子送入育嬰堂詒篋不甚深信恐其戲已明晨同
拉之堂呼兒出蓬頭歷齒如禿髮儻而清俊在骨蓋服役不修
飾耳磬呼兒曰此爾父也盍叩首兒果叩涕不已篋逡巡不敢
以爲實兒解衣出玉螭螭獻之篋始見知爲已物誤落婢處者
大哭失聲曰苦吾兒矣抱持哭兩弟欲携歸曰姑宛轉自往鄉
村奉青蚨一百千央族兄固先携兒歸詭爲所生立券轉繼篋
所以蓋人耳目也名兒曰玉螭字曾藥親教兒讀慧甚月卽完
一經年二十八泮三十成進士官部曹覃恩請封反先封本生
父固固喜曰旣得資又得封典此大便宜事恐古今來有一無
二也螭事父至孝娶名家女生子二均慧以父老爲置婢妾不
許官京都時與同歲樂君名桐者最契偶至其宅宴廳事語移

時太夫人潛於屏後聽之久呼桐入曰兒問客曾佩玉螭螭否
出問訊大驚卽解付桐獻太夫人遽出呼曰兒貴不識母乎螭
驚憶豁然悟抱膝哭暈收始甦互述顛末桐小於螭弟也由是
如親手足吾聞其事甚駭異後聞京江人云竈父富陝時曾平
反一案活十餘人云

懷儂氏曰阮咸盜婢而生遙集祁郎盜婢遂作天疇何其有幸
有不幸哉顧一綫宗支已由我而斬而枯楊復活蓬頭歷齒者
忽從天外飛來抱持痛哭喜極而悲固不待問而知其先世有
隱德矣至於纖纖一腹有兩貴子孰預知之柯亭竹爨下桐不
遇知音直廢材耳

葫蘆生

神居山有張君十三年將古稀因貧以授徒爲業然性好客慕

孔北海而力不逮嘗自書一聯云銷磨升斗狂彭澤慷慨交游
窮孟嘗意氣可想也是年應安宜某富室聘教諸子來去應由
秦郵顧寶應湖可逕渡較使易年終先生撤帳居停預訂明年
館置酒爲別曰歲事畢矣盍卽寒家貿易船送君歸遂打槳過
湖半日猶偃岸行忽一行路客繖一裹一赤足立淺水邊哀舟
子挈帶允豐酬舟子揚帆置不理張見其瑟縮歌叩須貌文秀
操燕腔意必非暴客良不忍遂代乞舟子行方便乃就近使登
鵲首曰此張先生好意也微先生言終不敢孟浪客向張謝問
何適曰有急赴揚州歲近取捷逕詎水天一色竟無片帆微先
生當臨河返耳旋向舟子曰飢渴甚矣有閒粥飯不吝償舟子
窘之張以茶果贈又呼與同飯飯已倚舷曝背解裹出青鞋布
襪着之腰下露一葫蘆極光澤又探囊取花骨頭卽北方所謂

骰者賭具也假碗揎袖呼而擲之色色皆應所呼張心異之間鄉貫曰南越北燕萍水人耳問姓氏曰葫曰安定後乃有此俊人曰某非古月者因常寶一葫蘆人多呼爲葫蘆生曰足下可謂壺公矣曰先生莫過譽如有縮地法曷有今日厄雖然壺中亦別有他法容獻博一晒請俟諸異日可乎天暮張不忍其露宿飽風霜呼進艤謙遜始入撥鱸火溫濁醪對飲客談古今於漢書尤熟張曰壺腹中本有漢書客曰是不過溷俗人耳非真敢稱博雅也張欽佩頗恨相見晚明日風逆再縱談遂訂交日則抵掌夜則抵足均願石尤來打頭翌將登彼岸忽私語張曰公能否過門不入先與我過揚一游或與公有小裨益詢若何以骰示曰此絕技也邇上爲肥商大賈所屬集藉以破慳囊曰僕年來修羊薄不足供母金曰無慮也壺中抽出蒜條瓜子等

金堆滿案張驚曰葫蘆些些大何藏得如許曰法也且不止於此也及收入仍烏有張本不羈士乃登陸遣舟返謝主人命僕人舁行李回神居村囑家人無懸懸當新春歸也事畢與客携手徒步抵楊入城賃極大空宅天已暮傾壺出小几榻帷帳盥盂等物咒之使大又傾出小男女廿餘人如婢僕庖輿之流咒之成真人曰此中無不有惟飲之食之者則仍購於市一瞬間則已酒沸於鼎香焚於鑪燈火明如白晝刀砧響庖廚奔走滿前布置貼妥居然閨閣矣張驚喜大呼曰葫蘆生真神人也客急搖手曰此三字非可以告人者僕已假得貴人名氏來言已壺中抽一名刺示張則大字峨峨依稀識是京中某顯者公子因笑曰張祿非子虛先生是亦仙人奪舍法也旋呼酒爲張洗塵珍錯腥臙悉非凡味壺中人一中年婦貌極妍名曰解人憐

善弋腔兩垂髻婢極窈窕曰箏箏曰瑟瑟善以管弦和絲肉互
奏張樂極漸覺玉山頽客曰公請休息乎卽命箏瑟擇廳事西
斗室爲張布錦衾角枕侍寢張起客亦擁婦自他室宿張聽諸
僕闔戶下鍵往來掃除炊許方聞寂兩婢爲張司按摩小嘲謔
惟一涉淫念則色變如夜叉收攝心神不敢輕薄明晨箏瑟不
見又兩婢以紫貂袍帽朱履來爲張易舊衣一名裊裊一名娜
娜貌勝前比客來如朝長上禮極恭亦鮮衣冠帽頓改舊觀蓋
亦自壺中出也謂張曰昨宵婢子惡已遣去矣若二子者或稍
勝一籌又奴子三四輩分進盥具者皆鄭櫻桃之流蒼頭傳朝
餐者不少長鬚崑崙諸狀少頃客起告暫別云謁諸當道果盛
服出鹽政府道令尹始到門其餘丞簿諸黷商則飛一紙不屑
看倒屣迎張獨居携小史偶於門首一瞻矚則蛇鞭雉帽排兩

行幡腹男子多人咸鵠立門條煌煌朱紅能耀眼正詳睨其水
衡而聞人已傳呼主人歸也果見四人昇高軒如飛狡僮二三
策怒馬追逐烈燄馳至闔市皆驚張急退避而客已揮汗坐中
堂約略三四言階下應者如旱雷聒耳旋聞鳴鉦呵導聲陸續
在門是皆上大夫來答拜者客隨意出迎毫無僣倨狀略寒暄
大夫曰君家長上前有書來云公子早出京何歲暮始歸曰山
左勾留有日矣擬來春往看兩浙好雲山故先至廣陵聊以卒
歲旋袖出鯉魚箋數十函分致諸大夫皆代述朝紳語問起居
諸大夫去又諸商冠服來客惟楊裘拖履以接略問訊卽互炫
聲伎之美商作媚態曰容深誠領教東山絲竹笑應之商去則
又持函以書畫屏幅來求客賜翰墨皆如意揮洒尾押玉印卽
刺上貴公子名稱謂亦極斟酌由此盃酒往來日無寧晷客厭

惡似以爲苦秋風客亦乘隙至以一瞬顏色爲榮客均有所贈
不吝也忽私囑張曰公於客至時須怒罵僮僕炒餠輩須官腔
莫土語明日商蜩集張果如所囑商悚聽客故作嗟歎曰此老
性氣猶未平然奴子亦太不可人卽命他伴往伺應商問伊誰
曰君等不知耶此卽張侍御之封翁素慕竹西風景家長上命
隨侍來誠不得已耳曰能容瞻韓乎曰大不易容介紹定可否
卽詣張室語移時出曰有緣哉然此老素懸乞包容幸勿貽罪
戾衆商隨之肅然入拜伏於地張惟援以手而略加額也傾談
見燭跋始退由是具觴飲者兼邀張以一顧爲祥瑞元旦交賀
訖客漸與諸商博孤注一擲常千金商私喜曰此難也當傾其
橐免渠作兩浙游惟碍張封翁計維誘與同博免饒舌由是張
亦脅入局暗與之金使之敗北無吝容三四日賓主負萬金張

私對客曰只見蝶飛尙未璧返奈何客笑置之一日諸商挾多金來請客曰公子退三舍不其餒與笑應曰諸君子是定不欲我回燕臺矣雖然張太父執尙有兩寶庫在山左容可通融卽出散開圍場客與張又大敗忽推如廁私語張曰是其時矣當看我意向步趨之可一戰而捷午餐後客又負故槓鬚乾急曰奇矣奇矣旋入內呼僮疊昇黃金五大塊出皆大如階砌石曰拚以此餽然非諸君現資一閱不可商眼炫亦大呼取阿堵物來須臾黃白者充砌於庭曰是尙不足作公子贖耶曰善遂再博漸反負爲勝商正驚愕已開夜宴客盡出壺中美妓歌舞侑觴座上皆醉客故訂明日約商不服堅請聯夜戰客曰張曰太父執高年恐不慣數更得張亦掀髯大噱曰是何言與僕卽鬻罄亦當爲諸君典釋作壁上觀衆曰甚善比通宵客竟大獲一

會計庭所堆積者皆適如數不放珠還矣商四散旋呼金肆中
執事者輩去預儲之一連數日博獲無算計除母金前後已得
白銀十餘萬一夕博者去客急呼肆人來全換金條兇而藏入
壺復兇諸男女各器皿均收入壺以零星白銀酬房主人堂上
錦繡全空仍着來時衣履兩人夤夜携手出綠楊城緩緩投西
山深處旭日上三竿抵一臨歧酒肆中沽飲話別張乞過從曰
可無須矣問何術之神曰此鵝籠教也公義可薄雲非苜蓿盤
邊潁首者請以五千金爲壽俾小康乃約計其直傾壺出黃金
若干錠代置腰纏張固辭不可曰區區不腆不過酬同舟一飯
之德耳問後會曰天涯海角不能定也因拱手鄭重分路而別
張歸遂致富辭安宜館時有郭孝子自金齒衛萬里尋親歸者
張偶語其事未述其名孝子已謠曰其葫蘆生耶問何以知之

曰是曾於大梁贈某數百金作路費嘗曰某於貪者則破之思孝義俠者則資助之無他法也張益信客爲非常人但不知議商於次日重到門首見人物杳然將又作何醜狀耳

懷僕氏曰聖賢仙佛所謂利己利人者無他一方便訣耳俗云與人方便卽與己方便惟張十三有焉葫蘆生遇貪則攫遇德則報術士云乎哉直俠義人耳或云渠旣術神何不臨流效杯渡故事噫水雲空闊之區正仙靈往來之地恐未容若輩橫行若龔商者胸無墨目無瞳家有鬼妻既有鬼馬魍魎輩且擲榆之矣况葫蘆生哉

來不得

吳君慎齋金陵人邂逅東魯偶與之譚金陵棲霞山慎齋曰僕髫齡隨先大夫任桂林方伯時知郡城外亦有棲霞山山有洞

中鑄來不得三字事甚奇言已以遊記示余故節叙其略以當探幽按桂林諸山奇特甲寰宇而是山距城僅三四里山腰爲寺寺後爲洞均以棲霞名土人曰此中有洞天也雖無稽然觀其深窺奧衍固不問而知其爲鬼神之窟宅洞口廣畝餘入里許出卽爲李氏之板栗園西有小池三面環石欄楯深數尺而無水行半里更有潭極深游者投一文錢半刻始聞丁東聲石鍾乳滴成鯉魚一鱗鱗如生再進則有童子拜觀音臥佛子母鹿靈芝螭蟹等像皆怪石生成惟妙惟肖者顧人皆捫壁惴惴行路逕狹不敢俯瞰遇小洞須蛇行過旁有大洞若城闕想卽土人所謂洞天矣路漸平透日色始達李氏園然游者必買炬倩土人導之行恐誤入大洞耳聞昔有丁劉兩少年邑幕府子負盛氣逕自燃炬入土人願鄉導不許抵小洞以爲不足觀遂

向大洞入未百步四面洞口若蜂房丁怯劉曰何餒也炬足供
夜游且窮其異遂携手行視兩壁果有生成石塔石菩提石羅
漢天人菩薩諸像怪怪奇奇更非洞口石鍾乳所結者可比正
肆窺矚忽有大聲如山崩石裂炬卽頓滅黑如漆覺有無數鬼
物來撲炊許始已鑽火燃炬視之蓋千年如扇大之白蝙蝠也
努力前行洞更鉅忽一白石插面如鏡鐫三字曰來不得心始
懼然猶勉進再數武欲尋歸路則石逕嶮巖森森林立竟不克
辨來時鴻爪矣再半日則炬盡以衣履代之衣履又焚仍不得
出相對悔泣欲解帶雉經又苦無繫處不得已互抱蟠伏俟
虺蛇裹腹時見青燐亂舞忽滅忽明鬼影往來魍魎奔竄身左
右觸手皆白骨亦不辨其爲人爲畜也久之聞金鼓聲若雷震
始驚而聽蓋兩家長上見其兩日不歸詢交游以及狎邪咸無

蹤跡旋知游洞事往詢洞口土人與李氏園丁始約略言其誤入急覓有膽力者廿餘人鑿金鼓燃炬分隊入呼二子名久之始遙遙有應者尋聲而進突見其身無寸絲面模糊若鬼聲微氣絲屬負歸月餘病始痊噫危矣哉相傳洞中向有絲竹聲風清月朗如奏鈞天勝朝有小黃冠自他處來對土人云此中有洞府通九嶷山奉師命來冀除遂走入土人日夜伺洞口卒未出迨國初有廉訪使某公抱奇癖裹糧提水來羣炬約供一月需者携侍從多人徒步入行三日而仙境終不可得至深處如洞口之石魚洞中之石塔等像亦并烏有正竭蹶行忽聞頂上有篙師弄船聲爭渡散市聲從者大驚曰此非繞城之長河下與廉訪亦愕然欲止步再深入則石笋森森然齒齒然幾無插足處所燃羣炬頓作慘綠色從者面灰死終不知小道士所謂

洞天究在何處廉訪乃廢然返歎曰仙境本縹緲能於重泉下求之乎出洞後卽命石工鐫三字於石鏡以戒來者由是洞中不聞絲竹聲百餘年亦無人敢冒險入不意丁劉兩少年竟貿貿然往雖幾喪命然游興亦豪矣哉官茲土者遂封洞門垂石刻石以絕遊蹤慎齋曾遊洞口達李氏園已覺奇勝惜不克進大洞追廉訪履跡未免餒矣茶話至此令我遊興勃勃

金蝦蟆

六合董翁善士也傳者忘其名家頗富有二子皆成立翁逍遙曳杖含飴弄孫暇則以行善爲功課邑有無賴子金蝦蟆者饒且獨無房產日居城闌隙地草棚中衣百結肘爲筌而踵爲決矣閒遊市塵詐取鄉愚財供博費資盡則再詐弱者憚其悍忍氣走强者稍抑之蝦蟆卽取碎磁片畫頭顱血泔泔拉之赴公

庭得同儕排解必攫其資而後已鄉人苦之比爲長橋蛟南山
虎而蝦蟆不能改有某紳以名刺送官杖之釋卽握刀詣紳家
門捋袴詈罵辱及先靈家奴轟出爭鞭之乃滾地罵如故屢杖
且荷校不能易其性一日邑幸呵導出蝦蟆正醉臥街心喃喃
罵人宰怒略審詰卽飛緝黑索牽之回署鞭之千餘死復甦翌
晨將以豎枷木籠畢其命翁聞之出資爲蝦蟆贖緣救出縲紲
歸則頂香登門謝翁方倚杖雙柴乃崩角在地翁曳之起問曰
若之肢體非父母皮膚乎抑若皮膚不知疼痛乎泣曰非不知
痛特欲果我腹不能恤我膚矣問何以至此乃泣言家本小康
父母素鍾愛縱其欲父母卒陸續貨田產盡則不能自生活亦
卽不知有睡恥又聞救爾得生以後將若何泣曰身敗名裂乾
坤皆窄自顧無立足地意欲逃奔異域死耳聞何不學小貿易

以無母金對問四民中爾豈無一業能者曰幼曾學蒸茯苓糕自家啖之味極甘美舍此實無寸長旣無資又無立錫處能立曠野中爲之耶翁審顧久之曰吾給爾資且給爾地盍試爲之曰諾翁卽以街左草屋三間與之釜臼等物略備又給青蚨十千曰以後做好人勿蹈故轍也蝦蟆由是賣糕味雖佳無人敢買之而每晨必敲柝築築過翁家以磁盎儲糕送翁之牀頭蒸騰香軟翁啖之甘囁日日送扣除所假十千數久之人漸知蝦蟆糕美啖之果甘爭食之奈彼欲揚其名得利薄本尋耗兩月餘十千盡矣惆悵無策翁知之又假以廿千後遂得法翁思蝦蟆旣自新日日市上行家中誰爲守門執炊爨遂又配以婢年餘蝦蟆大得利不復負擔竟擴所居蓋衡茅臨街開糕店兼售小菜茶酒過者車爲停履爲滿焉而每晨猶送糕於翁三年後

計糕資已盡抵三十千數送如故囑勿送指天曰蝦蟆活一日
送一日若間斷霹靂擊我頂翁由是反愛之往往携孫詣蝦蟆
糕店中坐夫妻必沽佳釀攢鮮蔬爲壽更市果餌啖翁孫兩家
日漸親愛如烟姻又二年翁年七十猶健飯齏髮皓然若畫中
人偶小恙臥房園食諸味不甘惟愛啖蝦蟆糕而蝦蟆突數日
絕跡婢亦然乃搥枕詈曰負心賊忘却階下受杖時耶久病牀
前無孝子渠何必然立命呼來會計糕值僕去移時回曰大奇
大奇問若何曰頃見渠僵臥牀榻如死惟胸頭溫已三日婢守
尸哭糕店門未啓耳翁聞亦駭詫次日夫婦送糕如故且補前
日所未送者問蝦蟆不語問婢婢曰渠新充地府勾魂使月必
三四日僵臥差竣始甦翁遂堅詢地府事蝦蟆隱約言之不敢
畢露問勾何人曰遠近善惡不等耳一日蝦蟆送糕來神慘淡

涕欲墮翁詈曰小子何故作此態令人悶損對曰小人不欲言亦不忍不言昨接地府主者勾符翁名已在符之第三不能不悲耳曰真耶曰真子若孫環叩求援救翁曰唉生死有數渠何能爲問何日勾我去曰小人尙欲詣滁陽勾旅客須五日往返第六日午時三刻乃翁捐館舍時也翁曰善蝦蟆去翁遂製冠裳掃櫬具遍招戚屬老友觴詠賦輓詩作生誄預衣殮裝把酒聽曲以待瞑自至第六日老幼咸集翁對櫬具坐廳事子孫環之哭親友視之笑羨者詫者疑者諸態并作遣人視蝦蟆正臥將至午翁言笑自若須臾過午仍自若霎時天暮且夜闌更自若衆大笑蟲散翁愧甚惟拍案詈蝦蟆猶憶天明或來勾遁兩日亦不復來乃大詫明日蝦蟆跋而來笑可掬翁詈曰小子何爽約戲長者得何罪乃伏地賀曰不復勾矣地下主者是日出

城烈天使過門偵知翁待死狀怒小人漏洩杖之百杖畢小人
哀白感翁厚預白之由主者色爲之霽檢示翁籍善果甚夥天
使見之喜已轉申東嶽爲翁延遐齡矣問延壽若何不敢言將
榜示翁見兩股果青赤皆瘡痕由是益善視蝦蟆不數年蝦蟆
生子頗聰穎又數年蝦蟆死翁壽至一百二十三歲時兩元孫
已入泮蝦蟆之孫亦入武庠翁高坐後堂受賀忽向外凝睇笑
曰噫蝦蟆來耶一笑遂逝

懷儂氏曰天下無不可化之人特未操化人之法耳化正人者
但與以言彼之過也出於偶然得我一言如醍醐灌頂豁然頓
悟化小人者必與以金彼之過也坐於困窮得我數金則改絃
易轍漸謀生機而況世皆欲殺我獨相憐其有不感激入骨者
乎今有人焉見敗類貧兒旣背後譏彈毫無惋惜更當面詈辱

詭示勸懲倘欲稍假孔方則怫然曰吾非不爲子謀特不能填無底壑耳弱者聞之飲泣而退強者聞之將甘於下流而不能復返矣董公之與蝦蟆是能得感化小人之法

缺鎖記

明季浙之天台山中有儒而兼賈者曰歐陽蝦與同里李誦芬友善娶郁氏年三十有五始生一子名杞旋生一女名如玉季娶戴氏亦生子名招哥生女名春娘襁褓中互訂婚以如玉字招更以春娘字杞崇禎間盜賊繇起蠟懼有瑣尾之患欲取一物爲兒女誌慮金玉不能保購良冶鑄缺鎖二一面鐫兒女生辰一面鐫里居姓氏牢牢繫兒女頸李知之賞其有識亦仿其製是年秋賊累至陷城闕復打糧村野間突至歐陽宅郁氏方抱女食於廳下賊遽擄上馬而西去蠟抱子匿夢園中獲免賊

去出瞰屋宇荒落如墟矣僕婢死亡逃擄殆盡逡巡抱兒泣哭
哭無所適適所居近官道不能潛將往依李至則闔室被擄無
一人甫出門又遇大隊至賊魁瞰兒眉目好欲擄之嬭不肯幾
鎗鋒刃下終爲賊奪而已亦被擄從此轉徙無憑父子夫妻以
及戚屬不能見矣杞性溫婉貌妍麗如處女賊挈之走西蜀愛
如所生稍長教之習書算兼跳盪藝頗出羣其父嬭爲賊脅去
司書記兼會計久頗信任但不能逃其母郁爲賊首脅作僞妃
甚專寵珠翠寶玉聽其需索賊首曲意媚之嬭隨賊至豫邵則
陷賊老巢不能出李誦芬與戴氏不耐賊中苦漸漸瘐死招哥
春娘爲賊假子女分兩處不能面卽面亦不能識杞在賊營轉
瞬年十六賊授以僞官杞不受私於無人處解視項上鎖知已
名氏居址甚悉陰有去志適賊中患瘟疫賊首驗杞領人改裝

之外郡市藥材得間遂逸不復歸拆冠上珠玉褪腕上金釧易
資作貿易往來荆楚間利大獲人有欲與之論婚者輒以干戈
未息無以爲家不違訂又三載天兵南下賊氛撲滅漢兵自
各處凱旋擄得賊營婦女互爭競其主帥恐恣成事端諭皆投
空野出賣得資瓜分各回籍耕種又恐老幼醜俊買者揀擇其
值懸殊令各以布囊裹身首每名十餘金只許囊外暗摸索不
容明白辨頭面檢定付金卽連囊以車馬負之去杞年十九已
卜宅黃皮設市肆暇猶事咕呬偶因訪友來漢廐黃鶴樓下旅
店中對房先有老叟在貌似軍官囊資頗豐杞惡其態不甚交
言見則領首而已聞叟欲往人市買妻已心亦動店主人又慫
恿遂袖金往心計云雖不容揀擇然值甚廉得妍者可爲妻媼
者亦可爲婢來時本帶有兩健驛卽御驛往至則布囊繫繫人

鼎沸叟亦在焉彼此相視而笑付以金各隨意負一囊返至
寓時日已下春叟解囊則一娉婷美女子年約十八九宛轉嬌
啼丰神絕艷叟大樂手爲之舞而足爲之蹈杞解囊則一龍鍾
老婦人年將逾甲子鶴髮雞皮杞甚懊喪欲遣之去媼笑曰郎
君買我來教我何處去耶老幼懸殊何敢望敵體幸并曰繼叙
尙能操作郎君如此表表何惜碗許開粥飯救一老婢子杞思
之良久悲曰吾少因兵變失怙恃母又無所歸曷卽爲吾母以
補天倫之缺觀母面貌想亦大家閨範爲吾母良不辱耳媼曰
妾爲人母恐折壽算然郎之言太重耶之心可感矣行當竭犬
馬報大德對房叟刻已携女入已室中再一詳視美真絕倫鄰
錢將往市上買酒肴爲今夕合盞之需臨行倩媼善視女夕當
以喜酒奉酬媼曰子且去老身自能與娘子清話伴寂寥也叟

去媼入室則見女粉面紅潮珠淚滾滾略問訊則放聲大哭自云身雖遇賊與兵時以剪刀自衛不致污頃爲人家買爲婦幸有歸着不幸又得一老翁白髮種種令人難堪自思仍不如死言已以剪刀示媼曰渠尙悻悻若犯我當乘醉先殺渠而後自殺媼勸慰之女意竟決乃自啼噓曰姻緣簿亦有註錯時耶我家小官官亦大不樂論渠人品若得配娘子真一對玉人也偏又相左誰敢小挪移爲媼皇補恨女聞之更哭聲淒肺腑媼忽大聲呼曰娘子無哭官人快來杞聞聲果至媼曰子兩人自審度尙彼此稱意否兩目相視瑩瑩有情媼笑曰虎口餘生一身僅賸落得做一大方便請官人卽携小娘子去逃遠方成夫婦豈不樂哉杞曰叟歸奈何曰渠歸不過惡鬧桁楊刀鋸老身自任之新月上予其速遁再緩則無及矣杞與女伏叩數十卽起

御驛出門杞以布巾罩女首然後詭告主人曰有急務先挈荆
人行乘便寄戚家房金回時給也主人信之聽其去媼見兩小
去已遠自卽解烏登榻假寐天暮雙歸呼篝燈置酒肴於案視
帳帷已垂榻下橫陳兩女罵意爲新人羞澀故態隔帷呢聲呼
飲媼捻鼻故作嬌喉應之曰妾頭眩昏昏先偏就枕耶獨酌早
請安置萬勿罪也雙聞之樂更非常亦不相強對燭傾醕肴盡
壺竭不覺傾頽餐已掩闔登牀宛轉調新婦媼以被蒙首笑曰
幾見一把子年紀尙急色相紅燭高燒若窗隙中有人窺伺殊
不雅雙果起滅燭而後就寢子飛未已恩愛非常已而晨光透
入雙於枕上突見媼詫曰子爲誰何妍媸之頓更也媼曰身已
相從更何窮詰但爲君婦卽爲君謀彼此一百廿餘齡從何得
子是以昨日爲君行大方便大功德使兩小成就刻已潛逃或

者上蒼憐念賜以佳兒亦可了殘年送窀穸也不然彼女子袖有剪刀意將不利於君得不爲君危乎且老與老偶少與少偶乃成佳偶又何事大驚小怪叟怒急起鳴於官官諸姓亦浙人近亦以無婢伺夫人正於人市買一雛婢極窈窕遂深悉市人事頃見叟狀幾致噴飯欲不理直而叟竟喧嚷媼又咕唧頗爲發科不得已姑爲遣役持符綰索往捕役詢店主云往西行卓午果於江汊得之杞正停村中午餐擬餐後覓櫓往黃陂捕與符閱卽同女隨捕回見官官略審實皆直供無諱語官問女究願歸叟抑願歸幼女曰雖同潛遁究未成婚旣不歸老亦不歸幼身曾幼字人兵亂遂失乞判爲尼待尋得故夫始爲長策問夫家何姓女自解項上鐵鎖呈上官念其文曰李氏女名春娘年周啐字歐陽天台縣有故鄉寶此藏篋無相忘杞聞之泣曰

我卽姓歐陽亦有鎖也正欲自解以呈官吏聞之躍起抱杞悲
曰爾眞吾子也杞不深信曰我能知爾鎖上字文曰歐陽氏名
曰杞家天台仙人里幼聘妻春娘李他日相逢知父子媼在堂
下聞之亦遽呼曰老奴汝尙與鼠雀耶自家見媳幾納爲妻非
人頭畜鳴者耶汝以我爲何我郁氏也因歷歷互述拋撇會合
之由悲喜交集官正駭詫其婢自屏後忽大哭奔出呼曰我如
玉也一家團圓奈何父母獨棄我不顧耶官問何憑婢亦於項
上取鎖鎖爲証文曰歐陽女名如玉家天台清溪曲父名蟬母
氏郁幼字李招哥寶此多福祿杞驗之不訛願當堂呈價贖妹
官義之卽令領回更命鼓樂送回廂俾一門重聚兩小成婚云
五人正稽首稱謝忽堂下馬夫年方十六七亦放聲哭問何故
泫然曰我亦有鎖鎖耳但父母偕亡兄弟旣鮮戚誼亦無更何

人憐我而携歸耶官命解而驗之文曰李氏子名招哥父誦芬
母戴娥聘歐陽舅執柯兩姓若朱陳寶此壽命多官喜曰今日
之事其功仍歸於歐陽郁氏若非伊片念調停暫時撮合則兩
家怨曠破鏡難圓一夕蹉跎新臺不免其此中具有鬼神乎抑
先世大有陰騭乎不然何遇之巧也乘此吉夕成就三對老小
夫妻笑我長官僅做一個現成媒妁

慎儂氏曰諺語云寧作太平犬不作亂離人古語云慘莫慘兮
死別悲莫悲兮生離此君子讀流離瑣尾之詩所爲掩卷流涕
也區區鐵鎖豈真如離人之左券耶抑真如月老之赤繩耶不
知者以爲鐵鎖其知者則仍以爲非鐵鎖

蚌珠

孫秀才名聰居三十六陂品既高潔貌尤翩翩而地尤四圍烟

綠結茅數椽讀書聲與漁樵歌相問答貧不能娶擇偶亦苛
年二十猶鰥也并白縫紉多自爲之門前楊柳千株繫艇子如
蜻蜓顧性最善常以傭書畫資購魚蝦螺蛤之屬親送入湖放
生湖干雜詠句云門前老樹澆枯藤戒殺年來勝野僧多謝綠
蓑人識我到門不敢挂漁簪手採湖鮮與湖毛荀芹風味亦陶
陶笑他咒龍生重贖何苦頭銜署老嬰雨雨風風怕出頭書叢
人拜小諸侯忽聽划楫呼生物又欲拋書泛小舟一日正解纜
忽一老嫗來曰孫秀才何往日放生去曰且住擬爲秀才作冰
生蹙額曰是大不易姑妄言之嫗曰人人道秀才家撒古竟果
然老身受人託一言重九鼎非徒攬喜觴飲也釜山神女夜光
娘子慕雅望欲附爲婚姻遣介紹乞季允生急掩兩耳笑曰顛
婆子戲弄書生幽明途殊語何不倫嫗拍掌曰人道秀才知天

下事洞庭柳毅藍橋裴航豈日日抱本頭者尙不知耶生日才
人繫空何能深信曰秀才不信何弗隨老身一覲夜光面曰諾
刺船三四里視荷花萬頃皆五色花瓣葉紋宛縷金絲鷗鷺水
禽往來若織內有數十小女子蓬頭鴉髻如村姑裝採菱藕作
歌曰採菱復採菱莫驚翡翠禽採藕復採藕惟羨鴛鴦偶雄鴛
文綵如鳳雛雌鴛渾樸如鷗鳬雄但憐雌交頸宿下眼何曾覩
野鴛可憐野鴛不知愁亦復雙飛古渡頭歌已見媼和生來呼
曰解姥姥携得玉郎來其夜光娘子媚耶曰然曰我輩粗釵膩
粉自信不減夜光姥姥何偏心媼未及答生笑曰休矣若以此
爲神女眞辱抹煞人請去僕尙踐蓬社約曰秀才休皮相夜光
置若輩中雞羣鶴也曰因此例彼可想見僕去休立遣媼易乘
菱藕船自鼓楫一笑去月餘媼又詣草堂曰夜光國色天人也

東海龍宮三世子從涇陽歸偶見夜光云比滿壇矣近欲下白
玉牀珊瑚枕爲盼夜光憤欲許老身力阻撓尙有一線望生曰
聽之曰後寧勿悔耶倏一黑胖男子門外過嫗指曰此夜光弟
也生大笑曰何如諺云娶妻看阿舅渠陂時可知其姊嫗面頰
逸去瞬屆中秋湖心鑑園桂花大開遊人雲集生亦往視殘荷
留蓋風景蕭條回睨園亭桂如黃雨香通鼻觀極沁極濃步入
則各處均爲遊人占坐茶烟酒霧雜以喧呶厭甚惟近水一茅
亭乃不加雕琢者閒無人視泥壁有題詠墨瀦淋漓猶濕句云
嫦娥明鏡古今持照盡人間好影兒多少斷腸痴女子可能高
眼判妍媸跋云是夕携解姥眺月於此閒話偶拈夜光生吟韻
再三如喪魂魄詫曰夜光詩耶然耶否耶對坐微吟幾忘日暮
去猶回顧筆跡秀媚心頗動途中遇一畫舫中坐二八女郎綰

衣翠袂雲鬢蓮鉤旁坐一嫗解也生急呼曰解姥耶嫗見生急下紡帷刺入花叢玉人不見亦不知其是否夜光歸涉冥想餐眠不安明日見嫗短棹隔小隄急趨與語且邀過從嫗笑曰老身夜夜織冰綃又爲夜光督婢繡幾忙煞實無暇與秀才閒磕牙曰夜光貌究若何曰鬼臉夜叉頭十指如葵扇秀才怕否曰乞姥姥怨小生毋謔也曰中秋遇畫舫酸目灼灼胡覩者非夜光耶生曰貌果美矣茅亭題壁句美人真才否請釋狐疑曰秀才真井底蛙耳言已忽忽去生由是思念悔恨遷怒採菱藕小女子聞歌聲卽逐去曰惡冤孽欲害殺小生月餘竟病日漸頽唐奴子延醫診之不愈纏綿牀第氣息漉漉奴泣曰秀才好掙扎有隱曲當明告或能竭犬馬生唏噓曰解姥奴會意禱於湖神果尋得嫗拉兒生曰老身非和緩能起沉痾者央何爲曰夜

光曰痴秀才請絕望渠已嫁三世子奈何生聞之大慟並絕嫗
去奚呼之不能魅方涕泣謀易簪忽嫗偕一美女子來撫生尸
曰郎速醒夜光在此生雙眸微啓一息頓延見嫗與女抽咽曰
噫來乎應聲復斃女口吐一白毬小如彈就生吻吮度之腹咽
咽鳴頓甦久之神定問女曰卿真夜光耶曰然曰卿爲小生吟
壁上望月詩方信女曼聲吟之生曰小生非不判妍嫗特爲高
眼誤耳嗣後生死惟卿與解姥所命嫗笑曰痴秀才前番高位
置喬行巡幾自殺身奈何怨蹇修挈女曰渠活矣娘子盍歸去
來女投袂欲起生伏枕哀曰少住小生自知罪因牽女裾死不
放嫗曰娘子不念舊惡拯爾殘生尙望婚媾乎生惟伏枕叩又
笑曰大謬田舍郎娶妻尙有小禮儀况娘子神女豈能移岸就
船窮措大甫得命卽生生糾纏煞人言已拉女遽去生大號奴

子恐其復歸急刺船追去意哀之返生哀哭不能已忽身後有人撫之曰痴耶少作態何必定愁啼如小兒驚視之女也曰卿慈悲小生耶曰妾與卿有緣願奉巾櫛恐卿非鍾情者動致執扇種種乖離特試之耳妾神女不似人間婚嫁醜如鳩盤尙欲喬倣作妾方圖百年聚忍遽去耶生喜自起掩扉其疾若失回視裊裊光潔几案安詳簾幕均如新製不及詢遽與寢處繾綣歡愛奴子追嫗至葦蕩中入一斗室入僅嫗在哀之嫗曰娘子回洞府盍止宿晨與俱去翌晨奴臥沙水上屋宇全空涕泣罵嫗詎已返櫓入門則女已對鏡早妝生爲勾鉛黃儼成伉儷由是日夕賭枚藏鈎不思進取女督婢課織值甚昂家頓富又以婢子名小青者配奴曰償汝露宿沙上苦耳且爲生置妾生日對芙蓉百年猶不足奈何使他人爭夕曰妾實不能作繭若

由妾斷宗祀罪何可言生雖見許而日惟偃女無一刻離夜寢
交構間一詳視妾也心雖駭異不忍言蓋女早檢篋出一青比
甲與妾曰每夕更於衣內對郎坐妾衣之卽貌似女言笑聲音
嫵媚無二明年妾生子女各一女尤愛憐忽一夕泫然謂生曰
緣盡奈何驚詢之曰實告君寵宮三世子怒妾託伊名且憐妾
美欲強奪生曰彼縱寵子奪人妻豈無罪明當作文預訴於上
帝女曰是宜用武明日君當携妾抱兒坐樓上炊許卽災難過
呼奴至書符黏其首以弓箭與之曰爾立門首聞吾戰酣呼破
塊子爾卽對白衣人射勿忘也三更許雷隱隱雨浙瀝五更尋
女不見不得已閉戶遣奴如女言奴彎弓俟見女軟甲繡衣與
白衣人戰湖上白衣人吐黑霧迷天地冰雹如雨女吐大赤珠
如斗照耀兩間颺颺水怪激浪如山爭湧至門見奴輒落若畏

其符少頃果聞女子呼奴手發一矢正中白衣腰膀雷大震化
爲龍西竄女亦化爲大蚌收珠入殼去巨如車蓋亭云生動輒
思女幸對新人如故人稍慰離情至我朝道光龍飛元年有戴
君湘圃居湖濱築望湖軒時月盡下絃夜色更暗忽湖中湧出
一鉤新月漸如初三眉兒瘦漸如十三眉兒透霎時飛起丈餘
一輪飽滿滉瀟空際光晶瑩照軒中几榻俱見視雪案蠅頭字
瞭如指掌時太翁在堂呼一家眷屬罔不驚幸忽一輪墮水隆
隆有聲激水跳珠滿湖星點明年戴君大魁天下方知此蚌珠
也或云孫莘老時曾見之是否卽夜光化身未能謬定惟天長
誌書云大蚌產山谷間能與龍鬥云

懷儂氏曰大凡事之易者情不專千呼萬喚始出來此美人擇
婿法也抑文人養才法也彼急驅者必猛顛過榮者必驟辱可

爲戒矣珠湖四圍皆平山培塿而秀色如沐蓋珠光耳漁洋山人過秦郵詩云三十六湖涼月上錯疑神女弄珠來意亦本此

莽頭陀

吾鄉城中有眞勝寺後爲羅漢寺古刹也聞諸父老云地下有古窖兩寺相通洞門卽在後寺佛座石臺基下以故洞門常閉塞不敢開寺之髡奴每至夜靜時聞地下有敲木魚梵唄聲誦云佛說般若波羅莽王龍德經爾時閻浮劫內毘耶國王膺疾示滅身臥龍榻臟腑沸騰瞑目待盡了髻雙童執拂驅蠅拂子誤墮王面王驚張目微叱魂魄飛越陷大澤中自顧已身已成異類鱗雪體練相柳方形不暇生物飢火燒心敬聞我佛說法給孤獨園匍匐奔至呼號懺悔問何以故我佛慈悲說無生曰如是我聞一念嗔恨遂墮惡趣當時言下大悟遍體清涼我佛

親爲摩頂西八東鱗擎雲飛去是故成龍相而非龍相非龍相而無往不成龍相無無龍相始成非龍相卽說咒曰波諦呢諦求脫離諦娑婆訶南無龍德王菩薩摩訶薩聞者無不駭詫適外間紛議時有枯瘠病瞿曇短軀如三歲兒從洞門出買來其食之仍歸宰聞之欲祛其惑命壯士然炬入洞覘其異見洞內果寬敞氣陰森內仍有石門東向餓汁灌閉之不能開洞口坐一肉身和尚冷如冰霜衣腐敝而趺坐不仆貧出而仍閉其洞問衆意爲此老誦經無疑或知其有道行者或疑爲鍊太陰者裝金供臺基上狀如獅隱佛久之地下梵唄聲如故亦無有敢再入者此明季事至我朝康熙某甲子邑大旱石爍沙煎井枯泉竭惟北城外有沙泉一甕尙清洌供民家汲飲一日天甫明牧豬奴起經寺外見一大白蟒巨如五石甕長不知幾許踰

脊過女牆俯首下就沙泉飲。囑囑有聲而後身半截猶在寺中。牧豬奴駭極奔且號驚寺隣。咸起見蟒逡巡頓縮入殿中去。其時主席者大了禪師聞之亟囑無妄言。是夜負月坐蒲團甫禪定。夢一白衣丈夫稽首曰。某隱於此久矣。赤旱地脉枯燥亟出就飲。不意俗子譁噪毀吾道行。將往峨嵋。薙染峨嵋爲震旦國第一山也。具足於彼。可結清靜緣。向蒙庇覆。敢不辭謝。和南言已飛去。師醒而誌之於壁。由是地下始無梵唄聲。三年後南山富室袁叟老無子。發願朝峨嵋。求似續。間關跋涉半載。方至以巨騾馱茶米布帛之類。遇洞居者與之布施。盡遣騾綱去已。則布襪青鞋獨詣峨嵋寺。焚香禮佛。遍謁執事僧。求見方丈。方丈驚詢鄉貫。曰莽頭陀。亦珂鄉同籍。挂搭於此已久。何不通訪一申桑梓情。卽命侍寮。引入香積廚下。見一火頭僧古貌方顙。蜷

鬚碧眼貌極粗魯指之曰是也叟因就與合十僧投火杖起握手殷懇如舊相識引至所居寮房几榻明淨瓶鉢雅潔不稱其貌叟問僧向在故里城乎鄉乎曰吾無家常寄跡後寺耳曰吾每入城完秋賦何絕未一識禪範僧笑而不對旋進清齋蔬筍伊蒲味極鮮美叟食如常人而僧則揎袖大嚼後以巨盞羹汁和飯雜餅餌雄啖之笑曰窮餓大肚皮飽餐常住飯居士莫齒冷叟愛其豪邁亦不之異黃昏清課衆僧魚唱僧惟誦龍德經聲如啼鳩不可辨夜夕引叟門外登捨身崖盡佛燈滿山晶瑩隨風飄舞瞥眼一燈飛至僧急攫以手送入叟口中屬吞之覺如九秋霜冷徹肺腑笑曰居士大喜明年今日當得一盜馨兒易生易長若欲貴仍須廣陰德否則僅博宗祧不斬耳居四五日夜與僧共榻寢雖隔被而冷氣常侵膚異之亦不敢問僧忽

問叟曰後寺方丈大了師無恙否曰大了師猶清健惟終日瞑目坐不甚餐飲似少生氣僧笑曰得之矣叟問僧曰師究何時歸曰大了圓寂或可暫回里門明日別僧殊戀戀臨歧贈青蛙二百斑剝陸離個個銅繡皆漢時古半兩也曰以此珮嬌兒歷不祥且囑曰居士下山約行四五里可憑眺無忘却亦勿遽回首也叟牢誌之乃打包徒步別去行四五里至丈人松下試回首望見山頂大枯樹上挂一大白蟒夭矯擎雲鱗甲渥雪頂有獨角其色殷紅口吐舌灑灑如朝霞駭極狂奔再里許不見矣遂由巖府覓船歸巴峽下流月餘抵里急尋大了告之已於山上問訊時圓寂矣叟於次年果生子名曰光字佛山聰穎可愛感其德遂出資爲大了購地瘞遺蠟火化舍利五色衆聞叟言咸翹首望頭陀返旣而寂然衆冠服送大了骨灰詣湮漿忽一

白衣小兒手託一石塔來曰以此作和尚塔可乎衆以其小而忽之忽風起沙飛頃刻豔暝風定小兒不見惟巨塔高六尺雕鏤精緻已端正壓涅槃上文曰紫衣大師衍派五十世行僧大了靈塔峨嵋莽頭陀遣工造送余童時遊寺中猶見階上有長方石寬二尺長五尺中鑿一方孔旁刻兩魚俗呼爲鮑魚池爲廟中一景云石初遇雨孔中有水魚卽躍入遊泳後爲雷擊斷不能靈其實乃塔基也而瘞骨所在竟湮沒不可攷

懷儂氏曰相柳率然之流珍重桑梓如此宜其脫胎換骨焚修名山今之人也其萍飄異地者或幕矣或宦矣或貿易稱閹朱矣見人之勝於已者分明秦越必曰吾鼻祖與君同里耳見人困於已者分明鄉井必曰吾與君素未謀面耳而且冷語浸人一毛不拔甚至從井下石極力擠排其亦愧此莽頭陀乎或曰

如頭陀乃蛇而人者耳

賺漁報

青島之術信於越而勝於皖歛之胡上舍名潛義者本殷實長子希郊年二十習武次子希祁年十五業儒父母卒已十餘年柩遷延尙未葬終日挈地師走山谷擇太苛吉壤頗難有門下客周姓者來告於胡曰某聞龍口村有片地諺云龍口村水清清有人來葬此代代出公卿翁畫圖之胡浼地師往周廻詳視曰妙哉沙水環繞的真牛眠然上有漁人居不知其售與否也胡詢周周慨然自負曰某願憑三寸不爛舌爲翁作說客翌趨往視村盡處有長橋十丈橋南老屋門首曬魚曬髡柳如人立上穹瓦絲縷縷其景幽寂門內有斑白婦與一青衣丫髻女子相對坐結綯正擬攬語忽有白髮叟遙自上流刺船來携巨鱗

艤舟樹根入門與婦語少頃卽提壺將出貰酒周急與拱揖叟
答而問曰君爲賦魚來乎曰非也然則爲買魚來乎曰亦非也
頃有事相訪乞容某盡其辭叟殷殷邀之茅舍中席綠蓑少憩
婦與女均避叟自言包姓祖業打魚居此近百年從未與冠蓋
交不審長者何齡而至此曰爲此一坏土居停胡上舍欲購作
先世佳城不吝善價也叟掀髯笑曰僕生涯寄扁舟頗不乏餽
粥此祖遺片壤也誠不敢售雖然長者來不易能爲蓬壁光請
以濁茗盡東道誼旋呼珠兒瀹茗出供客女應聲捧陶器來周
見其修眉豐頰舉止大方雖樸拙而有清艷曰此女公子耶曰
某無子僅此一女名珠娘慰情聊勝無也曰曾字人否曰紅鸞
尙遲也其所以然者某欲以半子托餘生旣不敢攀金龜婿又
不願許田舍郎耳周問頃見白鬢婆娑者何人耶曰山荆也周

懷歎興辭歸則枕上籌終夜曰有之矣翌見胡告以難購語胡再三託期其必成周曰渠有女與賢郎次公年相若若聘爲婦允養二老則渠有安樂窩地可得也曰豚兒偏強奈何曰許以多納小星何如胡又慮有後患周笑曰痴哉翁也渠但貪香餌則權在我善則綦之否則逐之何患焉胡曰善仍浼周玉成周三四往包漁夫婦始許可明春娶珠娘歸初頗得翁姑憐夫婦亦伉儷居二老於別院起居餐飲初亦安適詎吉毀漁舍浼地師點穴工人破土掘出一小石碣上鐫篆文曰橋南水九曲流橋北土葬公侯仁與義葬無愧暴與強葬必殃胡見之大樂葬畢築丙舍於左嵌石於壁諭示鄉人也年餘郊果由軍功歷登剡章官潼關將軍麾下叅戎胡居然封翁矣祁亦肆恣日事賭博與無賴游珠娘稍諷勸祁拍案大罵曰漁婢饒舌敢限我成

腐頭巾耶自娶汝時爲鄉隣笑婢子累人不淺哉珠慙極哀啼
翁姑反袒祁而祁更橫日於閫內施惡聲周知其不相能急以
多金購縣獄之女紅兒與爲妾踐前讎也包漁知之亦無如何
婦欲興問罪師叟曰吾女已失身若拚鬧是貽弱息罪戾也盍
隱忍之胡敵其懦禮節漸疎飲食漸菲終日兩餐如繫獄中囚
胡之亡父時歸而示夢曰葬我龍口村甚不安然旣葬矣當遵
石上字否則殃且至明夕又夢曰石上字非可藐忽幸勿虐珠
娘也若忘老父言悔莫及再夕又夢曰龍口村地更有主盍改
葬爲便珠娘父母當禮敬之萬勿使向隅胡醒總以爲夢幻無
憑不深信而虐如故也祁自娶紅兒視其妖艷變態殊甚珠房
竟絕跡且妝奩箱篋皆潛運一空一日珠遭紅兒謔浪憤告於
姑曰兒雖陋大也渠縱美小也竟若是無禮耶姑冷笑曰汝誠

大汝裙下蓮舟較渠大耳珠大哭回房思自縊又以二老在不
忍死包漁譖之確告婦曰我地雖擲舟尚在也盍再之水雲深
處覓生活免得低首向人乃痛哭與女決從此音訊斷矣女旣
痛親別又嘆夫惡遂雉經胡薄殮而瘞之北邙年餘祁每醉歸
輒見紅兒身右有人偎坐捫乳作嬉戲狀面目彷彿珠娘再詳
視又似一貂帽男子倏忽不見疑女有私瞽之紅怒曰我非漁
家兒能任汝作踐者我父公門虎也一怒當卽傾汝家祁亦怒
相觸從此詬誶終夜恒攪兩親眠不克安枕席一日又覩前狀
急抽刀大呼斫之鬼影滅視顱破血溢倒地斃者非他紅兒也
紅父鳴官訟欲抵胡傾產賄當道始照誤殺充雲南軍胡驚痛
猶冀長子郊有宦橐可再興忽一日大雷雨砂石亂飛籠口墓
震裂棺槨十里外白氣正矗地戶復扁石碣上字改朱家若刊

文曰居者漁廉者胡胡背義遭天誅地雖裂脈未枯後有來者
休妄圖胡跳足往觀墮大則幾沒頂數月撞關書來郊亦於是
日馬逸墮斃胡哀哭然悔亦無及也後果有窮秀才李十三者
父死無寸土聞雷篆語以輕價贖去葬父骨服闋卽鄉捷成進
士遂於漁舍舊隙築家祠亦以石碣嵌壁誌異且誌警也越兩
年官浙之督學使輜軒避雨偶宿古廟遇一老僧操土音知是
鄉人詢之卽包漁也自云刺船還去婦痛女哭泣死葬某山一
身落柘不願操舊業披薙遇恒禪師許度爲僧頃始挂搭於此
李告以胡家事包合十曰善哉善哉如是如是李回籍卽携歸
命居家祠司香火包請於李檢婦女骨瘞祠隙成小冢二誌以
石碑尾附短偈曰嗟我婦兮此生可哀自嫁黔婁百事皆乖嗟
我女兮此生何苦生適匪人死歸故土曠前世因今生孽苦薩

慈悲一齊解結日前作冰之周姓偶來游讀碑文未終行突倒地衣冠如蛻身則化爲小花麗猶猶不已歛之人觀者如市
輿僕氏曰胡門下周姓一吻猶耳善則殺之惡則殺之一言而已上十天怒罰之惟恐不工夫世之富而不仁者其左右必有一獻策小人贊成紂虐身之化犬其天之報與亦胡家亡者之靈與然包既僧矣何不誘而斬之劈伽藍煮作脯但恐此臭穢只可煮以乞丐豈不堪汚之以蔬筍廚也

要字謎

瀘州刺史劉公清白吏也老伉儷年六十惟一女醜惡絕倫其先保母戈媼本名將凌夷嗣私授以擊刺戰守法得心傳媼卒又以慈訓解填詞賦詩猜謎屬對稱典劉南垂髫卽抱奇志每讀史輒大言曰天生女子亦猶是人耳何必盡以簪花傅粉爲

可人以壓纔調羹爲能事彼馮夫人秦土官始爲蛾眉生色卽
題臥閣曰巾幗何曾限女流當自強北啼原可懼雌伏亦堪傷
枉逐牽羅伴安尋磨鏡那紅閨非桎梏心在白雲鄉公寓日頗
賞其磊落然公性深諱言獨每對寮案必曰家有豚犬兒不欲
其來沾宦習也二老壽誕女深尊內寢跪拜稱觴公唏噓曰老
夫作宦三十年誠不敢以小民脂膏飽我囊橐何中郎目前僅
有辨琴之女而廉吏身後且無荷薪之兒其得罪於蒼昊者深
與因與夫人泣下女亦洩瀾急以綵衣效萊舞爲二老壽時幕
府諸君競尙春燈謎公戲拈千金之子命女拆一字對云婉字
公首肯女亦以耍字進請公覆一美人名公拈髭久莫屬女曰
是花木蘭也問於意云何乃真女而假兒耳公軒渠曰汝今之
黃崇嘏乃亦效從軍人耶對云不可有此事然不可無此志翌

有宗人以五歲兒入繼公後愛其敏慧厚酬宗人歸携兒入朝
母拜阿姊命女爲弟更新衣女應命而已亦冠男冠服男服金
蓮履削裹裂帛裝敗絮外罩小烏靴然後携幼昆鴈行出雙雙
拜膝下二老駭且喜曰此誰家不櫛進士耶顧猶子之子不挾
比兒之兒恨補媧皇情移伯道自今以往當如是慰我桑榆也
公御下素厚臧獲無漏言明日出炫察衆曰兩兒戀父強自故
鄉來當引謁諸父執幸勿以歷齒蓬頭爲笑比呼至揖拜如禮
應對當行莫不交推二難無能辨烏之雌雄也遂名其伯曰世
積仲曰世珩從此肩隨公更授女以治譜追公卒璜年已十六
珩始七齡不能當大事女挺身扶襯回里服除卽援例爲縣令
謁選授蜀之納溪迎母弟居於署政聲大著執法尤嚴邑之大
猾畏其威閉戶不敢出東部有盜魁據險揭旗徇衆四掠女聞

報躬率捕弟子直入老巢手自馬上縛其渠其餘三四賊乃向
與役通者脫其罪責以誘捕自贖是夜牀頭聲錚然甚厲呼燭
覩一短匕首刺枕畔入木寸許心知盜所爲然掇益急獲卽手
刃之盜悉遁民賴以安其斷獄也無隔宿其刑人也必見骨故
劇盜相爲口令曰甯逢虎狼不遇納溪劉世瓚然案牘之暇惟
承母歡教弟讀印牀花落若無事者然人有訝其不娶者必以
家有糟糠對問何不納小星曰喜習靜也一時仕蜀之吏而能
者首屈納溪劉大令越十載宦橐餘數萬金上游正欲獎以劇
邑有方伯公子某素聞同官有私議女者良由螻蟻之領無稜
稜結喉櫻桃之唇無巖巖根蒂耳是日正有事過邑譙於署女
與酬酢豪飲極歡漏三下公子倚醉嘲云大令青春旣不尋故
劍又不覓新歡百里侯豈終鰥耶女笑領之隱几假寐公子素

不羈擬乘隙窮其變遂巡問甫近玉體女驚寤遽騰一足起靴脫而蓮舄露焉乃欠伸大叱曰僉唐突當死乃公自髫齡以至服官遊戲宦海已近廿年何竟爲豎子窺破雖然我報國撫民官箴凜凜乃巾幗而鬚眉者也不失爲奇女子如汝曹畫眉澡髮玉貌翩翩乃鬚眉而巾幗者也誠賤丈夫哉言已大呌喝立揮之出公子魂銷氣結乘曙色動策馬奔回方伯譴之急以他案劾其官遣媒妁授意將聘爲子婦怒曰老公憎憎彼不肖子破家憤也好價人事卽價薄之一端豈吾偶哉邑紳某慕女才色欲爲家兒委禽太息曰吾不能父於斯母於斯再婦於斯也解組日出辭諸幕府曰吾已屬倦飛之鳥若徒爲呼嚇之鳥一何可笑又入而跪白其太夫人曰昔日兒進娶字之謎今始驗乎請奉母返田園視弟成名勉加餐消艷景固無子而有子也

何必斤斤於真假太夫人曰善卽日買舟南下邑之岷焚香來岸呼慈母頌神君者以萬計咸涕泣不知所云船出巴山溪水甚惡一夕至三峽月色昏黃草木作人態猿鶴唳淒風女驚起卜以纖指曰此處恐有謀我者急呼母弟與婢媼咸起已則短衣握鋏針一把囑但閉艙坐勿語言然後揉升桅竿頂肆瞻眺少頃果有呼嘯來者雙槳如飛一盜厲聲曰劉使君好男兒昔不爲吾輩開三面網今當於此處解千金橐若則血吾刃女笑曰吾懷中有升許瓜子金正欲犒汝等有膽但親手接旋卽互詈互叫號母弟伏艙底戰欲死忽聞阿呀聲繼以骨冬聲聲聲不斷者片刻餘孽忽哄散曰使君真神勇也吾輩且退女含笑下中艙慰母曰阿娘無怖兒已誅鼠賊從此坦途矣問何術則己身登絕頂賊欲得其人而甘心者必仰面口銜刃手援足蟠

由下而上女待其近綈以雙針釘其目賊見其手無寸鐵不知
前進者何故顛入水益魚貫來咸背裂斃蓋以逸待勞皆戈媼
所授訣也一家忤欲女獨洒淚憶保母不置抵錢塘始露雲鬢
反初服置田宅西湖上終日奉母泛舟於天光雲影間尋六橋
勝蹟弟珩善讀瞬游邑庠領鄉捷卽爲之娶名家女以媚北堂
女則長齋繡佛焚修比優婆太夫人矜其志轉幸守貞可長聚
首一日有老尼負長劍來不假闕傳直詣女室相與合十已卽
云願以啞謎爲女縣令叅箭鋒悟棒喝何如曰可乃雙蒲對坐
互衍奧禪侍兒莫測其淵旨尼忽詢納溪前事女笑云是不過
耍笑一場耳阿師毋齒冷尼亦捧腹云以女人身現宰官相抱
璞不雕流澤靡量耍笑一場自家招狀直待蛇尾羊頭當遲子
於妙高峯上也尼去後女神悟非常雙瞳忽作紫碧色至午年

太夫人示寂女縗服携小夫婦送葬畢仍易男子裝珩問云何笑而不答歸途車聲轆轤頓失阿姊所在有房老云老尼頗似戈媼面目疑其有尸解術來尋高足弟子也

懷僕氏曰劉世瑛姪隱娘後一人也若使之建五丈旗必有非常用方伯公借他案削其職反成其高不知是何居心一把繡花針旣刺鴛鴦亦誅豺虎天下無藥物在用之者神而明之耳彼方伯所謂縣令者微倖仕進兩手如死匏一旦遇賊卽身先鳥獸散較之劉家女公子不嚇煞亦當愧煞

公道娘子

揚州西山有富翁葉姓名槐業賈胞弟葵業儒均承先人產業董氏尤內助槐每與肆夥會稽董輒於屏後較錙銖然絕不市田畝廣第宅因未析居也葵遊庠舉優亦名下士嗜聲色重好

友有急難來告者時盜公中財帛與之鄉里稱爲二善人而兄則惡其所爲嫂尤甚焉會秋闈兄勉與朱提三十金作川資請益不與葵妻郝氏素賢置酒內室爲良人作祖餞唏噓曰君晦運未退此去恐數奇然無如何宜早歸毋浪費不然恐蘇季子爲君之前車也葵笑領之晨起解纜風利抵燕子磯閒步江岸見背山臨江一帶村落頗饒畫意青帘出樹杪臨風動搖知是酒舍欲沽飲入門則衆方集一狐酒氣醺醺目瞑若昏睡詢之曰此物蹤跡詭甚時竊飲頃沉醉倒甕側始就縛將剝革補裘償酒債耳葵意良不忍急摸腰裏得銀二兩請易之遂祝而後放狐解縛頓醒目眈眈視葵久之竄竹逕中遂杳明日抵金陵覓寓廬步通衢見無賴輩假託欠官項賣妻子者輒分資與之友笑其迂葵曰吾行吾心之所安不計真贗也未入場資已耗

試舉榜發依然康了貸友人金始回兄嫂果白眼如妻言而妻獨慰藉之良厚董謂槐曰阿叔不才子耳吾夫婦晝夜大辛苦能爲渠償無底壑耶盜析居聽若所爲槐信之憑戚屬等分書自得十之九以一歸葵猶津津市恩戚屬得槐賂無一言鄉里竊爲不平乃挈妻另宅住臨徙入與兄辭槐曰而今而後吾弟好自爲富與貧毋告阿兄也乃默對父母木主漚淚去然葵雖得一猶五千金遂修屋宇置器具日與風雅者遊益以好義周急爲事後漸不支又嗜酒得病臥牀伏枕徒搏空拳而已生子一名麟穎敏嗜讀親亦溫婉人矚其貧無與議婚者幸妻郝氏賢紡績度日磚燈藥竈晨夕經營暇猶課子讀明年麟入泮立意攻苦冀博一第爲老親吐氣獨居園內小樓書聲常徹夜隣叟五更起猶見樓上燈光熒熒葵兄弟不通問訊者十年矣

槐兩鬢將斑猶持簪權子母得黃白藏以窰閉密室私曰庫生女一行八名萼仙少於麟未字也一夕夫婦小飲醉臥時溽暑竹簟棕床甫交睫聞床下有窸窣聲瞰之有光一女子蛇伏撚紙作燈照蚊蟲駭問之不見次夕又見怒叱之卽拋磚擲瓦舉家驚惶董北人知爲狐乃告槐謂宜敬祀可勿擾夕果女子牀下立倚几微笑着白紗短汗衫綠褲褶足纖纖如笋芽同詢曰卿仙人耶曰然曰旣仙人何匿吾牀下曰奴豫產無名字前生與萼妹本手足頃遠來相訪耳董呼萼起會晤果歡喜如舊相識遂請於萼房下榻女大喜願拜爲螟蛉女長萼一歲衆呼爲七姑娘朝夕偕萼間起居間卽刺繡寡言笑舉止大方居然閨秀久之衆忘其爲狐矣尤善卜生理如女言必獲利失物如女言必復得畏見男子雖門外五尺童罕能覩其面者婢媼有微

勞必向二老索微資獎之自云無一錢衣履與尋互着雖舊敝
女衣之如盥且香欲爲易新衣曰兒與尋妹了緣耳渠嫁兒卽
去敢久累耶以是老伉儷益深信之使人誇於葵間甚駭妻欲
往閱堅不許麟雖樓上讀亦微聞其異一夕讀倦口燥欲呼茗
聽機聲停知父母就寢街柝轉三更矣猶夷間聞扶梯有蓮屣
微步聲問伊誰曰太夫人遣送茶果來視之二八好女子也亭
亭如玉不辨誰何大驚面失色女啓櫻粲曰大郎不下樓故不
識耳奴管家李嫂之猶女也朝來看嬌蒙夫人留住嬌昨午瀝
菜圃苔滑傾跌至今骨酸痛故遣奴來分勞麟思家本有李嫂
卽亦不懼飲其茶清冽達心脾意旋湧不能持挽女頸戲之曰
得卿爲紅袖添香人方不負此半窗明月女面頰微笑收盒欲
去麟挽之曰卿知我猶童男否女曰誰辨耶真僞耶曰卿且辨

之遂與狎女曰耶固童男奴亦處女兩小歲稔幸勿狂暴侵侮
入帷于飛樂甚麟復挑燈抱女端詳曰李嫂髮蓬蓬雞皮皺何
福得卿爲猶女小生雖貧當破產購卿爲良匹死不憾也女推
枕而起笑曰耶明日問李嫂否曰容暗訪之曰曠誤矣妾與耶
戲耳耶以妾爲誰大伯家七姑娘也若真僕婦女郎又冠而歌
朝雉太夫人能遭乾柴近烈火耶麟駭詫且以兄妹名分痛悔
女笑曰書痴何必爾妾與耶有夙緣其所以先詣渠後詣耶者
亦良有故如慎密可永好耳雞唱飄忽去由是脂夕不至至必
伴麟讀自亦搦管另燈爲麟抄制藝字跡明媚如其人間亦携
酒肴猶枚射覆爲樂牀第之事惟許一月三度麟每坐愁歎女
詢之以貧告曰此何難鬚眉男兒直得愁阿堵物耶次夕携鋤
來招麟廟蒼苔寸許翹露白銀滿焉女去告父母掘之數千金

嗣後女所指擬必得異之女曰此天旌耶孝也奴豈真如碧眼
賈胡耶由是家暴富一日葵病篤醫術窮麟下樓侍疾女亦不
至因思古孝子有刲股救親者迨向晨偷至樓下焚香告天解
衣露刃正欲割臂上肉女忽至聖刃擲地曰郎讀書人亦效此
愚孝耶妾心碎矣可惜我兩人未分明難見翁姑耳麟急往告
母且述至富之由益神其術母恍然曰得婦如此能以非類見
棄耶且七姑娘仙人也必能救而父吾方欲香花供養之何匿
爲言次女已珊珊來母急抱於懷曰兒吾家福星也女拜母母
答拜袖出赤丹如豆付麟曰可吮而度之少頃腹震震若雷鳴
喉格格欲吐吐寒痰碗許疾若失遂拜翁問何術之神曰翁久
貧鬱甚矣今暴富心花怒放塊壘動故憊耳此散鬱丹也適僕
婦入女急遁附母耳畔小語曰母慎密洩則兒去矣由是乃麟

能見他人不能見也女自遇麟蹊蹊往來而萼仙固無日不與女共餐眠次年大比麟與女別殊戀戀女饋遺甚厚矮屋中所需者無不備麟去果捷泥金報喜女私以珠玉值萬金爲賀葵頻富子又貴兄奇之而不知其由亦深悔從前之刻意多致賀金以挽回之及發銀篋蕩然急視庫則封誌如故而奩中皆去其半大駭統計所存僅十之五問女不承疑之鎮以茶米加以符籙而耗脫如故旣而微聞麟事痛恨急遣幹僕走江西求天師天師行符檄神將覆以事關恩怨不平難於驅逐僕哀之且獻重資始遣法官齋符一往而女在家已知之笑曰我去易耳何必費許多事且我乳母已來帶我矣果有白髮媼領騾綱十餘頭來媼入門與女絮絮語女盛粧入與二老告別怒不語女惟含笑轉握萼手曰妹子倒好吾不忍別解手上金釧贈之曰

他日有難可呼七姊姊我自來救忽忽出門與媼各跨一騾其餘皆若有重篋在背腰幾折鐙震震向西去葵夫婦聞女同去惋歎麟更傷悼議婚必却衆笑曰痴男子爲狐婦守貞耶隨入都會試行至黃河邊將渡忽帽內甚重心異之試語曰七妹耶曰然曰何不吾袖中匿已而袖果重渡畢與麟同車輿夫不能見夜宿店間女曰自分不能見卿竟來耶笑曰多少事未了耳抵京試畢竟落第麟悲感方擬整裝同歸忽吏部報單到門蓋已相授湖北某郡知府矣詢女女曰郎命官只能得一科榜猶翁積德所致僕一作京華塵徒尋煩惱不若乘壯年作一太守猶早得雞豚逮養耳曰五馬非兩萬金不可豈易猝辦耶曰妾行時騾背上物運此久矣昨始遣人上兌耳益服其神陞辭謝恩畢回籍總養版任所從此玉容人皆見之事翁姑至孝相夫多

政辭晨起偶于後園看芍藥一老幕府謝公見之詫容貌酷似其女娉娘女故遲遲瞻眺益冀若非兩婢侍側幾誤呼爲女異之告于葵夕侍宴葵轉告女女唏噓再拜曰實告翁兒卽江干被執者也伯翁析不平兒暗分之使平旣報大恩又體天意今事畢兒亦從此辭矣一家驚挽之倉猝遂杳麟觀腰粧零釵痛哭欲死葵急聘娉娘爲媳幸對新人如故人稍可解免萼仙自女去卽適同里程孝廉偶難產幾絕因憶女言急解劍擊而祝之曰七姊姊救我應聲墮一丹藥服之兒呱呱啼視之英物也槐不知是夕仍與妻訴誓女忽覺房外有聲甚厲走視之壁上留書一行曰七姑娘離痴翁媼知悉分爾財與爾弟一家人何彼此我不過作公道人耳再置當盡擲去無悔某年月日槐見之大怖及聞萼仙難產事益驚遂潔龜立主祀之題曰公道娘

子之位葵夫婦八十卒於官時麟已生三子扶櫬歸遂不仕槐
夫婦亦相繼卒麟以長子承重厚葬之三子皆貴遂闢兩宅爲
一題所居小樓曰仙雲如昨之樓每登樓獨酌娟娘偶過談猶
驚起懽逐曰七妹來耶

懊儂氏曰張公九世一堂流風已遠世人親骨未寒析分遺產
强者吞弱者死走訴成羈意惜季路一言卒之隊引豺狼利分
齔蚌公道已難更有控諸大府意求主章之折斷亦復木偶登
堂胥隸果順公道更難勢必待妻子嗷嗷貧無錐立而後已地
下父母靈若有知能不撫膺而痛哭也哉若七姑娘者感恩而
來報恩而去分香判袂留有餘不盡之情又不僅僅乎公道已
也果有其人則凡詠賊丕之豆萁當盡化爲田家之荆樹

除三蠶

滄洲西郊山色葱蒨處隱極大村落爲衆孫闔族居族之長名
百藥字邈孫農叟且儒生也家赤貧性獯介幼聘某氏女未娶
卽殞戚因貧無與論絃續乃獨處如野僧衾寒枕冷魂夢不甘
者五十餘年矣所居村之隙三間茅屋插籬爲垣挂箔當戶輟
耕之餘猶肆歌嘯聲震震出金石瞬屆除夕風雪滿天膝六夜
舞子弟有以麪糲蔬肉饋歲者雜野蔬製作餅爲明朝薦春盤
供客亦自餉泥鑪燒槽柶煨濁酒一壺叟且製且飲鰓趣頗閒
聽庭外有脆折聲方懼蹙眼爲鵝毛壓損忽有踏軟瓊掀箔而
入者譴之則一二八好女子也容旣絕代粧亦非時翠襖錦襦
襜褕鞦綠袴褶進則脫外罩紫披風挂泥壁卽云處士大忙不
嫌手垢駁許分任其勞乎叟思村婦中無其人深夜窮村亦不
應有侯門亡者疑於裏惟笑頷以首女偶鑑略與纖纖指卽凭

几製一二枚絕工綴叟贊云式仿紅綾樣能入畫娘子何巧哉
女笑而不語惟星眸錫澀竟體芻香似與叟有同嗜卽滿引一
觥飛至云田家釀想不清旨尙堪一哂乎女含笑遂對酌須臾
益沉醉玉樹頽矣一樹海棠嬌喚未能醒叟起撫香肩衣皆薄
綿肌如起粟憐之及視壁上物大驚紫披風突化爲茸茸敗狐
革口鼻尾爪悉具者也急覆以自家敝裘然後就燈詳視益確
始恍然悟玉人爲狐適將執爨乃藉作引光奴然濕柴燄發爆
金星霎時煨燼再入座女已欠伸起喃喃軟語曰醉鄉之遊樂
乎旣而掀背上裘倉皇四顧索披風竟烏有窘迫萬狀向叟禰
衽云公長者也幸勿惡作劇倘賜反璧感切淪肌叟始猶推託
繼因其哀涕遂直陳女哭曰冤孽哉實告君妾上界天狐也修
千年始脫革功尙虧不遽棄頃貪杯中物遭楚人炬赤條條將

何所歸乎叟引過謝不輟女又問一襲敝裘究誰爲之覆叟云是尙有他人耶乃賤子憐卿寒耳曰噓春授暖緣遂因之袍澤之親卽肌膚之愛儒家以爲仁道釋家以爲挂碍處士累人不淺哉妾守離得嫁一老男子本無顧惜然而半世之苦行一朝成敝屣矣言已更泣叟再拜云門外泥深可沒髀娘子纖足何能一步行倘恕庸濁許結天婚則小國瓢卽予之宮也更何歸焉女歎云是亦氤氲簿上註定婚媾耳妾何敢與數強因自述無姓氏名曰花歡喜同儔呼爲花娘子失怙恃孤與叟同旋聞雞唱爆竹震比隣女殷勤焚栢子燃樺燭同拜天神地祇然後交賀曰與郎約元旦固不能行合卺禮卽宗人小輩亦不容觀面且闕余斗室中百日後始妾身分明耳聞能預白宗人否曰雖無媒妁神天臨鑒何諱之有哉言畢卽進室且下鍵隙皆幕

遮光鮮一綫但每有容白輒應諾宛在其中也朝曦上茅簷老
稚咸集笑舞縷述昨宵事眾軒渠疑鑿空旋聞屋內有咳唾
聲始信云翁既僊仙媛是卽從母從大母行也敢不稽首拜瞻
慈範叟云且緩以百日爲期是亦仙偶囑衆疑信者半然一瞥
眼則昨夜之不託皆蒸騰列几上初無僕御供傳發送客反問
云頃爲卿之狡獪耶隔戶應云旣爲人妻理司中饋嗣後有所
需耶但高聲卽能自致由是傳說遍遐邇其急欲擴眼界者反
憾春日遲而薨虜生矣先是隣村有馬氏三豎其一曰馬時夜
臥人家屋脊上僵若死伺屋內一聲息卽應聲化貓犬走而橫
內錢物空矣覺者自內呌喝施器械則滾向外自外罵罵擲瓦
石則滾向內倏來去如鬼蜮焉其二曰馬安時之弟也披狗皮
學搖尾酷肖盧令夜入人家盜貨財覺者蹴之則吠聲如豹擊

之則身捷如猱立而施老拳尤勇無敵其三馬菊花時安妹也
夕盜男子淫必飽吸其精死方已又黑夜伏曠野引吭哀喚黑
甜中有誤應者卽攝人魂裝入魄偶腹演雜劇攪路人錢與墮
孕婦胎剪小兒私爲兩兄鍊迷藥又屢矣官俱緝術窮殲一孽
而不可然皆虐遠郡不敢慢近村頃聞孫家事卽乘機至將移
禍於仙百日內村中果時時夜驚叟不知也先期折簡招村人
盪果冠裳益至視茅龍不剪而門外錦步障可十餘畝匝地覆
紅氍毹陳設珍寶俗目多未經且僕婢滿前鼓吹疊奏每一答
應聲響若雷叟與女出華服艷粧衆驚爲天人不覺頻首而屈
膝矣女邈而有體倨而能容堂上下開玳筵數十座珍錯盈丈
席天倫極歡然杯斝間時竊竊耳語蓋訝其爲富貴村氓鄙俚
不得不以夜驚疑花娘子矣夜深兩行畫燭送之洞房在天比

翼罔喻斯歎明日客再到門則屋可打頭鹿場如故也叟出偶有所聞歸而怨女曰家徒壁立誠愧對仙人然古之泣牛衣者獨非伉儷哉卿若厭貧大好遠引幸勿學穿窬貽田畯憂耳女佯問云何叟告以村中所疑女曰嘻妾偶縛情絲已難飛越若再破殺戒更恐沉淪但勢如虎背究未能已已者也越三日召村之耆老告曰荒村賊警外有疑新婦者然乎否乎新婦方擬出奩資廣仵陌築第宅若此事不明玷辱奚甚今宵賊之至略施勅勒以縛之幸勿輕縱也衆以手加額曰旣爲新人鳴冤又爲此邦除孽幸甚幸甚夜半土竄果又來時甫登屋突鷗尾上有巨手來縛心急化鯉奴空中驚撒獵網以蓋之不得逸安掀狗皮却走亦如膠粘莫能剝成真狗焉聞時在網中號欲囓網救之亦吸入網時北斗闌干村柝漸懈而女已遣兩牧豎擇一

巨鼓繞村呼擊賊衆起視猶曰貓犬耳何張皇耶云花娘子傳語是卽賊也當昇往責供詞伏人心女乃燃燭茅簷下坐而受俘執指咒云棄人身廿獸體包獸心滅人理遇仙人獸亦死貓犬乃作人語供不諱村人辨其音曰快哉是馬家二孽也女問曰何如衆乞新婦施行曰焚之時安大呼曰娘子亦異類奈何虐吾輩至死女笑云寧可物而人不可人而獸吾無湯王德能爲汝開三面網也速舉火毋多言衆噉應荷束薪如山烈燄既熾擊骨成灰馬菊花間變大哭切齒曰吾必有以報狐媚女每傷湫隘頗難堪叟以貧對笑曰是何足慮江海多無主之物惟仙人能取撈便耳因陸續自牀底運出白銀二萬兩購田塢可接雲興土木比閭閻從此人喧於室馬騰於槽比舊居判雲泥矣明年春女有妊將婉預懸壺於門口向外人問之笑不答是

夕正臨盆馬菊花披髮紵衣持刃突至將履園颺然翹飛下蓋頂若山邱不容一掀擲人方奔避而屋內呱呱啼嬰兒正墮地是爲叟之長子也村人聞菊花墮內如蒼蠅聲自訴報兄仇將甘心於花娘子今遭毒手悔罪矣願宥之自投魍魅地不敢再櫻夫人城也村無男婦莫不撫掌恐逸出仍不利於產婦即環炙巨炭一甞亦焦時正苦旱明日沛甘澤滿溝洫慰三農人以爲花娘子除孽之報云年餘女又育是爲叟之次子長名曰伯雍次曰叔和皆穎敏入邑庠均娶名家女女相夫教子督織課耕勞瘁極矣而姿致長如二十許人叟則雞皮鶴髮漸龍鍾每聞云卿旣仙矣能無却老方乎僕若先化恐卿亦孤寂煞耳女曰或吾歸甯時當爲君采一鳳麟草曰卿前云孤子何又有家笑云不過鷓鴣程迢遞耳妾姊妹宛若亦久賦離羣卓午携叟走

入山中不見明午又携手從門外歸子婦爭問訊大笑絕不言
何往惟髮顏色光澤健步異尋常又五年雍和同榜成進士旗
鈴到門叟正與女餐餅飲村醪聞捷髮啞然一笑目遽瞑逝矣
女毫不哭泣殮畢亦臥牀呻吟抱重病雍和奔歸哭甚哀女呼
而諭之曰娘本不當死奈前除三寶爲閻摩所惡數不可逃矣
其速辦樽具與汝父聚泉臺言已起趺坐玉柱雙垂含笑亦卒
出殯日冠蓋而送臨穴者千人覺女材獨輕謀開視則一玉簪
一古鏡屍不見也年餘長婦病歿至一處山水樓臺色皆金碧
桃花萬頃天吳紫鳳相往來忽有呵殿至者金芝翠蓋車上端
坐一美人謔之姑也急下拜姑告云阿婆已奉帝勅主此山爲
除蠶真妃阿翁亦翠帶成見仙臺無苦小夫婦積善做人家不
必念椿萱旋出松花餅與婦餐婦三咽而醒病旋瘳雍出官侍

郎和官方伯子孫亦繁衍多貴人此丁君樹亭所述者
懷儂氏曰人與狐偶歷代甚多何足奇所奇者爲大地除妖孽
既智勇且決斷視執法懔懔之官宰爲何如平生有大功德於
民者死當百世祀尸解後膺帝封分也彌留時數語未免猶巾
幘習氣